

БӨЛІМ: ЖАЛПЫ РУБРИКА

Сәкен Сейфуллин мектебінің 90жылдығы

ЖАРИЯЛАНДЫ
18.11.2024СІЛТЕМЕ
https://bilimger.kz/170110/

Сатымбай Майгүл Жыйғанбайқызы

Алматы облысы Талғар қаласында орналасқан Сәкен Сейфуллин атындағы №2 жалпы білім беретін орта мектеп өзінің 90 жылдық мерейтойымен қатар белгілі қоғам қайраткері, ақын Сәкен Сейфуллиннің 130 жылдығын атап өтті. Мектеп тарихы— терең әрі шежірелі. Бұл білім ордасы бірнеше буын шәкірттерді тәрбиелеп, еліміздің дамуына зор үлес қосты. Қоғамның сан саласында мықты маман болып, жемісті еңбек етіп жүрген азаматтардың алғашқы алтын ұясы болды.

Талғар аудандық Мәдениет үйінен бастау алған «Сәкен Сейфуллин – асқақ биік дара шың,

Болашаққа бастап бізді барасың!» атты әдеби – сазды сахналық кештің беташарында көрсетілген бейнеролик қарт шаңырақтың 90 жылдық тарихи шежіресінен сыр шертті. Іс-шарада ардагер— ұстаздарға ерекше құрмет көрсетіліп, сый—сыяпаттар табысталды. Белгілі қоғам қайраткері Сәкен Сейфуллин атындағы қара шаңырақта үздіксіз еңбек еткен ардагер— ұстаздар арасында ҚР білім беру ісінің үздіктері, Еңбек Ері төсбелгісінің иегерлері өте көп. Осындай мықты мамандар тер төккен білім шаңырағынан 90 жылда түлеп ұшқан түлектердің қазіргі таңда жоғарғы қызметтер атқарған білікті басшылар , майталман мамандар, салиқалы азаматтар болғаны көңіл марқайтады. Мектеп шәкірттерінің «Болашақ бағдарламасы » бойынша шет елдерде білім алып, керемет жетістіктерге жетіп жатуы— білім ошағының сапалы жұмысының тағы бір дәлелі іспеттес. Аудан көлемінде өткен айтулы іс—шараға мектептің Алтын және Күміс медаль, Алтын белгі иегерлері де үлкен сағынышпен келіп қатысты. Меркеге арнайы келген зейнеткер ұстаздар мен 90 жылдың түлектерінің ыстық лебіздері көрермендерге өте әсерлі болды. Мектеп ұстаздарының орындауымен көрсетілген екі актілі спектакль Сәкендей алаш арысының өмірінен үзінді көрсетті. Ұлты үшін басын қатерге тіккен ұлы тұлғаның халқына жасаған қызметі тамаша сомдалды.Мектеп ансамблінің орындауындағы күй және 60 оқушыдан құралған хор тыңдаушыларға керемет әсер қалдырды.

Жиналған қауым мектеп ұжымына ыстық ықыластарын білдіріп, ардагер —ұстаздар

шәкірттерге баталарын төкті. Алдағы уақытта да білім мен тәрбиенің алтын ұясы болуына тілек білдірді.

Сәкен Сейфуллин атындағы мектептің бұл қос мерекесі — білім беру саласындағы жетістіктерді көрсетуге, сондай-ақ, жас ұрпаққа үлгі боларлық тарихи тұлғалардың мұрасын дәріптеуге арналған айтулы шара болды. Жоғары деңгейде өткен меркелік шараға «Ата- ана Мектеп Оқушы» үштігінің жұдырықтай жұмылған бірлігін көрсетіп, ата —аналар комитетінің төрайымдары мен Қамқоршылық кеңес мүшелері де келіп қатысты . Бұл іс—шара — көрермендер арасында отырған білім ұясының облыс жұлдегері «Адал ұрпақ» командасы құрамы, Алтын белгі үміткерлері, сынып көшбасшылары мен озат оқушыларының жігерін жалындататын үлгі болғаны анық.

Мәдениет үйінен кейін қонақтар мектеп алдына тігілген қазақ үйлердегі дастарханнан ауыз тиіп, Сәкен Сейфуллин музейін тамашалады. Мұрағат меңгерушісі, көп жылдар еңбек сіңірген ардагер —ұстаз, Бауыржан Момышұлы атындағы «Шапағат » төсбелгісінің иегері Босқымбаева Анартұрсын Мысақынқызы қонақтарға әсерлі әңгімесін айтып,мұрағаттармен таныстырды. Мектеп түлегі Б. Момышұлының келіні Зейнеп Ахметова мұражай альбомына қолтаңба қалдырды, шәкірттерге аналық ақылын айтып, бата берді.

Салтанатты іс-шараның соңын Сәкен атамыз бен мектеп ұжымынан бақилық болған жандардың рухына бағышауға жайылған ақ дастархан қорытындылады. Ас үстінде ардагер— мұғалімдер бүгінгі алған әсерлерін бөлісіп, жастық шақтарымен қауышқандай болғанын айтып алғыстарын жаудырды. Ауқымды да берекелі іс— ынтымақты ұжымда еңбек етіп жатқан 170 ұстаз бен техникалық қызметкердің жұмыла жасаған қызметінің нәтижесі екені аңғарылып тұрды. Келген қонақтарға құрмет көрсетіп, асқан қонақжайлылық танытқан білікті мамандардан құрылған ұстаздар қауымының ерекше еңбекқорлығы бірден байқалады. Мектеп ұжымы алдағы уақытта да заманауи білім беру мен тәрбиелеу жұмыстарын жетілдіруді мақсат тұтады. Білім ордасының қазіргі басшысы, педагогика ғылымдарының кандидаты Мушрапилова Замзагул Төлеубековнаның ұйымдастыруымен жоғарғы деңгейде өткен бұл іс — шараның тарихи және тәрбиелік маңызы зор екені даусыз .

ҚМ АА Куәлік нөмірі: **KZ45VPY00102718** — ҚР Мәдениет және Ақпарат министрлігі

© 2026 **Bilimger.kz** Ақпараттық-танымдық білім порталы. Барлық мазмұн авторлық құқықпен қорғалған.